

आकाशवाणी

खास-खास खबरां:-

1. पच्छिम बंगाल च विधासभा चुना दे पैहले गेड़ ते तमिलनाडू च इक्के गेड़ तैहत वोट पाने दा कम्म बड़लै थमां जारी ऐ।
2. चुना आयोग नै प्रधानमंत्री नरेन्द्र मोदी हुंदे खलाफ अपमानजनक टिप्पणी करने लेई कांग्रेस अध्यक्ष मल्लिकार्जुन खडगे होरें'गी अचार संहिता दी लोआंगना करने पर नोटिस जारी कीता ।
3. दिल्ली सरकारै विजन पलूशन सर्टिफिकेट दे कुसै बी गड़डी गी पट्रोल- डीजल- सी.एन.जी ते एल.पी.जी नैई देने दे निर्देश जारी कीते न।
4. ईरान नै आखेआ ऐ कि अमरीका ते इजरायल आसेआ संघर्ष विराम दी खलाफवर्जी दे कारण होर्मुज जल डमरु मध्य नैई खोलेया जाई सकदा।
5. उत्तराखंड दे चमोली जिले च बट्रीनाथ मंदर ते कपाट अज्ज खोली दिते गेन- केदारनाथ- गंगोत्री ते यमनोत्री धाम पर बी यात्रा रमानदारी कन्नै जारी ऐ।
6. केन्द्र सरकारै ऑनलाईन गेमिंग दे प्रचार ते विनियमन सरबंधि नियम-2026 दी अधिसूचना जारी करी दिती ऐ- एह नियम पैहली मई थमां लागू होई जागंन।
7. आई.पी.एल च जंदी रातीं राजस्थान रॉयल्स नै लखनऊ सुपर जायंट्स गी 40 रन्ज कन्नै रहाया। अज्ज शामी मुम्बई इंडियन्स दा मकाबला चेन्नेई सुपर किंग्स कन्नै होग।

<><><><><><>

WB -TN Polling

पच्छिम बंगाल च असैम्बली चुनांस दे पैहले गेड़ ते तमिलनाडू च इक्कै गेड़ तैहत वोट पाने दा कम्म अज्ज बड़लै थमां शुरु होई गेदा ऐ। पच्छिम बंगाल च पैहले गेड़ दे तैहत 16 जिलें च फैले दे 152 असैम्बली हलकें च अज्ज मतदान होआ करदा ऐ। तमिलनाडू च सब्बनै 234 असैम्बली हलकें लेई बड़लै 7 बजे थमां मतदान होआ करदा ऐ- जेहड़ा संज्ञा 6 बजे तगर जारी रौहग। तौआई इनै दौनै राज्यें च चुनाएं गी शांतिपूर्ण ते बवस्थित ढंग्गै नै करोआने लेई सब्बै बंदोबस्त अमल च आहन्ने गेदे न। चुनांस आयोग नै एह निर्देश जारी कीते दे न जे चुनाएं करी आम जनता गी कुसै किस्मै दी असुविधा पेश नैई औनी लोड़चदी।

<><><><><><>

EC- Kharage

चुनांस आयोग नै प्रधानमंत्री नरेन्द्र मोदी हुंदे खलाफ अपमानजनक टिप्पणी करने लेई कांग्रेस अध्यक्ष मल्लिकार्जुन खरगे होरें गी आचार संहिता दी उल्लंघना करने पर नोटिस जारी कीता ऐ। खरगे होरें तमिलनाडू दे चेन्नेई च इक संवाददाता सम्मेलन च एह टिप्पणिया कीतियां हियां। आयोग नै श्री खरगे हुंदे थमां 24एं घंटे दे अंदर जोआब मंग्गेआ ऐ। एह नोटिस बी.जे.पी. दे वरिष्ठ नेता ते केन्द्री मंत्री किरें रिजिजू ते पार्टी दे होरनै ओहदेदारें थमां शकैतां मिलने दे बाद आयोग आसेआ जारी कीता गेआ ऐ। आयोग नै आखेआ ऐ जे पैहली नजर च ईयां बड़ोआ करदा ऐ जिआं कांग्रेस अध्यक्ष होरें आदर्श आचार- संहिता दे प्रावधानें दी उल्लंघना कीती ऐ।

<><><><><><>

PUC- No Fuel

दिल्ली सरकारै ब्हाऊ दे प्रदूषण दे कारणें गी घट्ट करने दे अपने जतनें गी जारी रखदे होई इक होर महत्वपूर्ण फैसला लैता ऐ- जेहदे मुजब कुसै बी गड्डी जेहदे कश वैध प्रदूषण नियंत्रण सर्टिफिकेट यानि P.U.C नैई होग- उसी पम्पें पर पट्रोल- डीजल- सी.एन.जी जां एल.पी.जी नैई दिता जाहग। जारी नमें दिशा-निर्देशों मुजब पेट्रोल पम्पें पर ईंधन छड़ी उनें गड्डियें गी गै दिता जाहग- जिंदे कश पलूशन सर्टिफिकेट होग। इस बारे सब्भनें पट्रोल पम्पें ते सी.एन.जी स्टेशनें गी निर्देश जारी कीते न कि हुकमै दी पूरी संजीदगी कन्ने पालमा कीती जा ते जेहड़ा कोई बी इस हुकमै दी अनदिक्खी करदा पाया गेआ- ओहदे खलाफ सख्त कारवाई कीती जाहग।

<><><><><><>

Iran-Hormuz

ईरान नै आखेआ ऐ कि अमरीका ते इजरायल आसेआ संघर्ष विराम दी खलाफवर्जी दे कारण होर्मुज जल डमरु अज्ज नैई खोलेआ जाई सकदा । ईरान दे मुख्ख वार्ताकार मोहम्मद बागेर गालिबफ़ होरें सोशल मीडिया पोस्ट पर आखेआ ऐ कि खलाफवर्जी च ईरान दे बंदरगाहें दी अमरीकी नौसैनिक नाकाबंदी शामिल ऐ। ईरान दे राष्ट्रपति मसूद पेज़ेशिकियन होरें आखेआ की ईरान कुसै बी गल्लबात लेई तयार ऐ- पर कन्ने इब्बी आखेआ कि कीते गेदे वायदें ते प्रतिबद्धताएं दी खलाफवर्जी- नाकाबंदी ते धमकियां अस्सल गल्लबात कराने च मुख्ख रुकावटां न। मंगलवारें बड्डलै इयां बझोया करदा हा

जे अमरीका ते ईरान इस हफ्ते पाकिस्तान च नमीं शांति वार्ता करगंन- पर एह वार्ता अजें तगर शुरु नई होई ऐ। मंगलवारें रातीं अमरीका दे राष्ट्रपति डोनाल्ड ट्रम्प होरें अमरीका-ईरान संघर्ष विराम गी बधाने दी घोषणा कीती। व्हाइट हाऊस दी प्रेस सचिव कैरोलिन लीविट होरें मगरा साफ कीता कि ट्रम्प हुंदा एह विस्तार अनमित्थे समें लेई ऐ ते एहदी कोई समें-सीमा नई ऐ।

<><><><><><>

Badrinath –Portals Open

उत्तराखंड दे चमोली जिले च स्थित बद्रीनाथ मंदिर दे कपाट अज्ज बड्डलै 6 बजकर 15 मिनटें पर वैदिक मंत्रोच्चारण ते रिवायती अनुष्ठान दे चलदे शरदालुएं लेई खोल्ली दिते गेन। इस मौके पर मुख्य भरै थमां ज्हरां बददे शरदालू मजूद हे ते अजें बी उत्थे शिव भक्तें दी भारी गिनतरी च मजूदगी दिक्खी जा'रदी ऐ। एहदे कन्नै गै उत्तराखंड दे चौने धाम तीर्थ स्थल बी शरदालुएं लेई खुल्ले न। केदार नाथ धाम दे कपाट कल खोल्ले गे हे। गंगोत्री ते यमनोत्री धाम पर बी यात्रा पूरा चाल्ली रमानदारी ते बवस्था आहले ढंगै सिर जारी ऐ।

<><><><><><>

Online Gaming Rules

केन्द्र सरकारै ऑनलाईन गेमिंग दे प्रचार ते विनियमन सरबन्धी नियम-2026 गी अधिसूचित करी दिता ऐ ते एह नियम औंदी पैहली मई थमां लागू होडन। इनें नियमं दा मकसद ऑनलाईन गेमिंग गी विनियमित करना- नागरिकें दी सुरक्षा करना- माली प्रणाली गी सुरक्षित रक्खना ते इस्तेमाल करने आले अधिकारें गी बनाई रक्खना ऐ।

मीडिया गी इस बारे जानकारी दिंदे होई इलैक्ट्रानिक्स ते सूचना टैक्नालोजी मंत्रालय दे सचिव एस. कृशणन होरें दस्सेआ जे सरकार इनें नियमें गी लेइयै बड़ी संजीदा ऐ ते इस गल्लै दा पूरा-पूरा खयाल रक्खेआ जाहग जे पैहली मई 2026 थमां इनें नियमें गी बवस्थित ढंग्गै कन्नै लागू करी दिता जा।

<><><><><><>

IPL Cricket

IPL क्रिकेट च राजस्थान रॉयल्स नै कल रातीं लखनऊ सुपर जायंटस गी 40 रन्ज कन्नै रहाई दिता। 160 रन्ज दे लक्ष दा पिच्छा करदे होई लखनऊ दी टीम 18 ओवरें च छड़ी 119 रन्ज गै बनाई सकी। लखनऊ सुपर जायंटस नै टॉस जितियै पैहले गेंदबाजी करने दा फैसला लैता हा। पैहले बल्लेबाजी करदे होई राजस्थान रॉयल्स नै 20एं ओवरें च 6एं विकेट दे नुकसान पर 159 रन्ज बनाए। खराब बल्लेबाजी दे बावजूद 7 मैचें थमां 10 अंक हासल करियै- इस जित कन्नै राजस्थान रॉयल्स दी टीम दुई थाहरै पर पुज्जी चुकी दी ऐ। उप्परोतली चौथी बारी हार दा सामना करने दे बाद लखनऊ सुपर जायंटस 9में नम्बरै पर ऐ। रवीन्द्र जडेजा गी प्लेयर ऑफ दा मैच घोषित कीता गया। अज्ज शामी मुम्बई च चेन्नेई सुपर किंग्स दा मुकाबला मुम्बई इंडियन्स कन्नै होग। मैच संजा साइडे 7 बजे शुरू होग।

<><><><><><>

Tahtagata Holy Relics

भगवान बुद्ध दे पवित्र तधागत अवशेष केन्द्र शासित प्रदेश लद्दाख दी यात्रा पर लेते जा करदे न। एह पैहली बारी ऐ जिसलै पवित्र अवशेष देसे दे अंदर कुसै प्रदर्शनी लेई

अपनी स्थाई थाहरै सवां बाहर लैते जा करदे न। एह घोषणा कल नमीं दिल्ली च इक
प्रेस कांफ्रेंस च दिती गई- जेहदे च केन्द्री संस्कृति मंत्री गजेन्द्र सिंह शेखावत ते
लद्दाख दे उपराज्यपाल विनय कुमार सक्सेना मजूद हे।

<><><><><><>